



**KJKP „Tržnice-pijace“ d.o.o. Sarajevo**

Id.br: 4200683020005

PB: 01071104

U/I : UF/I-2630/05

Na osnovu Odluke Nadzornog odbora o raspisivanju konkursa za izbor i imenovanje Izvršnog direktora KJKP“Tržnice-pijace“ d.o.o Sarajevo br. 2993-5/21 od 28.06.2021.godine i Odluke o imenovanju Komisije za provođenje konkursa za izbor i imenovanje Izvršnog direktora KJKP“Tržnice-pijace“d.o.o. Sarajevo, br. 2993-5a/21 od 28.06.2021.godine, Komisija donosi

## POSLOVNIK O RADU KOMISIJE ZA PROVOĐENJE JAVNOG KONKURSA

### I OPŠTE ODREDBE

#### Član 1.

Ovim Poslovnikom uređuje se način rada i odlučivanja Komisije za provođenje javnog konkursa za izbor i imenovanje Izvršnog direktora KJKP“Tržnice-pijace“d.o.o. Sarajevo (u daljem tekstu: Komisija).

#### Član 2.

Rad Komisije zasniva se na načelima zakonitosti, nezavisnosti, nepristrasnosti, objektivnosti, efikasnosti i javnosti.

#### Član 3.

- 1) Komisija provodi postupak javnog konkursa u skladu sa odredbama Zakona, odredbama Statuta Preduzeća i općima aktima Preduzeća.
- 2) Komisija je dužna čuvati službenu tajnu i druge povjerljive podatke koje sazna u obavljanju svoje dužnosti.

### II SASTAV KOMISIJE, PRAVA I OBAVEZE ČLANOVA KOMISIJE

#### Član 4.

- 1) Komisija za provođenje javnog konkursa broji tri člana ( predsjednika i dva člana) iz reda zaposlenih kod poslodavca KJKP "Tržnice - pijace" d.o.o. Sarajevo.
- 2) Komisija se imenuje na period do okončanja procedure za provođenje Javnog konkursa i potpisivanja ugovora sa izabranim kandidatom iz člana 1. ovog Poslovnika.

#### Član 5.

Administrativno - tehničke poslove za potrebe Komisije obavlja sekretar koji je zaposlen u KJKP "Tržnice - pijace"d.o.o. Sarajevo, Služba za pravne, kadrovske i opće poslove.

#### Član 6.

Ukoliko se utvrdi da je predsjednik ili član Komisije u srodstvu sa nekim od prijavljenih kandidata u pravoj ili bočnoj liniji do četvrtog stepena i u tazbinskoj liniji do drugog stepena, predsjednik ili član Komisije će odmah ili najkasnije dva dana od dana saznanja za razloge izuzeća, zatražiti izuzeće u Komisiji.

### III - NAČIN RADA I ODLUČIVANJA

#### Član 7.

Komisija je samostalna u svom radu i odlučivanju, a poslove iz djelokruga svoje nadležnosti obavlja u skladu sa zakonom, Statutom i općim aktima.

#### Član 8.

- 1) Komisija obavezno radi u punom sastavu, te odlučuje o svim pitanjima iz svoje nadležnosti većinom glasova.
- 2) Sastanci Komisije se održavaju na zahtjev predsjednika koji predstavlja i zastupa Komisiju, saziva i predsjedava sastancima Komisije, potpisuje akta Komisije, stara se o primjeni ovog Poslovnika, stara se da Komisija radi u skladu sa propisima i obavlja druge poslove.
- 3) Članovi Komisije dužni su da prisustvuju sastancima Komisije, učestvuju u sačinjavanju pitanja za intervju (razgovor) sa kandidatima, provođenju razgovora i ocjenjivanju kandidata.

#### Član 9.

O svom radu Komisija vodi Zapisnik, koji je sastavni dio dokumentacije, a isti potpisuju predsjednik i članovi Komisije.



#### Član 10.

Ukoliko predsjednik ili neki od članova Komisije privremeno, trajno ili u dužem vremenskom periodu bude spriječen da vrši svoju dužnost, dužan je odmah pisanim putem obavijestiti Nadzorni odbor radi imenovanja novog člana na tu dužnost.

#### IV POSTUPANJE SA PRIJAVAMA

#### Član 11.

- 1) Po isteku roka od posljednjeg objavljivanja javnog konkursa za izbor i imenovanje Izvršnog direktora KJKP“Tržnice-pijace“d.o.o. Sarajevo, Komisija pregleda sve pristigle prijave i dostavljene dokaze, utvrđuje njihovu blagovremenost, potpunost i ispravnost i sastavlja spisak kandidata među kojima se provodi izborni postupak.
- 2) Spisak kandidata iz stava (1) ovog člana potpisuju svi članovi Komisije.
- 3) Urednom prijavom na javni konkurs smatra se prijava koja je potpisana od strane podnosioca. Potpunom prijavom smatra se prijava uz koju su priloženi svi dokazi o ispunjavanju općih i posebnih uslova naznačenih u javnom konkursu za izbor i imenovanje Izvršnog direktora KJKP“Tržnice-pijace“d.o.o. Sarajevo. Uz prijavu se u originalu ili ovjerenim fotokopijama, prilažu dokazi naznačeni na konkursu za izbor i imenovanje Izvršnog direktora KJKP“Tržnice-pijace“d.o.o. Sarajevo. Blagovremenom prijavom smatra se prijava koja je podnesena u roku određenom od posljednjeg objavljivanja javnog konkursa za izbor i imenovanje Izvršnog direktora KJKP“Tržnice-pijace“d.o.o. Sarajevo.

#### Član 12.

- 1) Neuredne, nepotpune i neblagovremene prijave neće biti razmatrane, kao i kopije tražene dokumentacije koje nisu ovjerene.
- 2) Komisija pisanim putem obavještava kandidate čija dokumentacija nije ispravna, odnosno nepotpuna i neblagovremena, da nisu na spisku kandidata među kojima se provodi izborni postupak, sa navođenjem razloga zašto pristigla prijava nije ispravna, s tim što se kandidatima ostavlja mogućnost uvida u dostavljenu dokumentaciju, u roku od tri dana od dana prijema obavijesti.

#### V PROVOĐENJE IZBORNOG POSTUPKA

#### Član 13.

- 1) Proces izbora kandidata, među kojima se provodi izborni postupak, provodi se putem intervjua.
- 2) Intervju obavlja Komisija pojedinačno sa svakim kandidatom, čija je prijava uredna, potpuna i blagovremena.
- 3) Komisija će o vremenu i mjestu održavanja intervjua obavijestiti kandidate putem pošte ili e-mail-a.

#### Član 14.

- 1) Komisija će se sastati jedan sat prije zakazanog termina održavanja intervjua i tom prilikom će utvrditi kriterije i način provođenja intervjua, te sastaviti pitanja iz oblasti komunalnih djelatnosti, opća pitanja o radu i djelatnosti KJKP“Tržnice-pijace“d.o.o. Sarajevo, pitanja iz nadležnosti i odgovornosti Uprave, poznavanje propisa koji se primjenjuju na rad i poslovanje javnih preduzeća.
- 2) Intervju se sastoji od 10 pitanja.

#### Član 15.

- 1) Kriterij za uspješnost kandidata je ostvarivanje najmanje 50% potpunih tačnih odgovora ili najmanje 60% kao zbir potpunih-tačnih i nepotpunih-djelimično tačnih odgovora na postavljena pitanja.
- 2) Svaki član Komisije učestvuje u intervjuu i ocjenjuje kandidata.
- 3) Rezultat za ocjenu kandidata će se izvršiti na osnovu zbira bodova koji su dali svi članovi Komisije.

#### Član 16.

- 1) Komisija će na osnovu utvrđenih bodova, a koji predstavljaju rezultat zbira bodova, sačiniti listu uspješnih kandidata.
- 2) Listu uspješnih kandidata potpisuju svi članovi Komisije.



KJKP, „TRŽNICE-PIJACE”

71000 Sarajevo, Mula Mustafe Bašeskije 4a  
Tel:+387 33 20 53 53. / Fax:+ 387 33 20 55 49  
E-mail: [kjkptrznicesa@bih.net.ba](mailto:kjkptrznicesa@bih.net.ba)

KJKP „Tržnice-pijace“ d.o.o. Sarajevo

Id.br: 4200683020005

PB: 01071104

U/I : UF/1-2630/05

**Član 17.**

Komisija je dužna Listu uspješnih kandidata sa bodovima dostaviti Nadzornom odboru u roku od tri radna dana nakon obavljenog intervjua.

**VI ZAVRŠNE ODREDBE**

**Član 18.**

Izmjene i dopune Poslovnika vršit će se na način i po postupku za njegovo donošenje.

**Član 19.**

Ovaj Poslovnik stupa na snagu danom donošenja i primjenivat će se do okončanja procedure za provođenje javnog konkursa i potpisivanja ugovora o radu sa izabranim kandidatom.

Broj: 3076-1/21

Sarajevo, 30.06.2021.godine

Predsjednik Komisije  
Emir Dervišagić